

四庫全書

集部

欽定四庫全書

集部

後村集卷四十五

詳校官庶吉士臣吳烜

主事臣呂雲棟覆勘

總校官進士臣朱鈐

校對官主事臣陳文樞

謄錄監生臣馮堪

欽定四庫全書

後村集卷四十五

宋 劉克莊 撰

書

丁丑上制帥

竊惟今日重戍在邊兵力疲於暴露民力病於轉餉國
力窘於調度此中外痛心疾首之時也士之欲進言於
戲下者多矣往往竊嘆私議相顧莫肯發曰不在其位
也曰交淺言深也某之不肖廁於幕下之一士不可謂

之不在其位矣又蒙幸於左右者有年不可謂之交淺矣默而不言誼不可矣情不忍也夫官以江淮制置使為名府事但兼之爾而足迹不至淮甸自江以北付之文移晨起晏罷坐曹据案與治州縣無異精力耗費於簿書而聞外之體統未明智慮周匝於事物而天下之名義未講此失臨遣之意一也官軍按甲不動而藉山東羣盜之力以收舊彊彼皆以殺人掠貨為事欲其秋毫無犯所至牛酒開門迎勞其可得哉沿邊守宰誘殺

附騎兩淮惡少俘奪人畜義旗所向有旅拒而無響應有
堅壁而無倒戈此失弔伐之名二也張魏公秦丞相雖
歪正不同然終身各守一說今也知戰之必不可已而
不敢力主也知和之決不可為而不敢深詆也若攻矣
而又欲守既守矣而復欲攻內無執持遙有稟聽擇善
不勇慮患太深宜以去位為難乎此失去就之義三也
凡此三失愚請極論其所以然者夫欲有事於仇敵此
天下之公憤也非一家一人之私憾也奈何不昌言於

朝不博採於衆徒與二三君子籌之彼唱甚高之虛言
我圖甚難之實事不出力以助我而持論以律我或漸
變為知難而退之說或遂謀為潔身而去之計古之君
子與人同樂必與人同憂今之君子預吾成而不預吾
敗共其安而不共其危此愚所未曉也先生能以一身
受公議之責而不能以公議所欲為者精白言之於上
何歟蓋自南渡以來國家畏敵之病何其深入骨髓也
昔也畏敵之新熖今也畏敵之餘威有可強之勢而自

貶以趨弱有可勝之理而預憂其必敗謀國至此可謂拙矣自古任責大臣其胸中必有卓然不可易之見至於成敗利鈍雖以諸葛亮之明不能逆覩然討賊之義不以成敗利鈍而遂廢也今帷幄之籌無所堅決疆場之吏無所稟承欲乘機進取則上制乎廟謨欲偷安退保則下畏乎公論聚十數萬兵境上退縮如處女之不窺門戶也謹畏如彭祖之觀井也日月逝矣機會坐失如天下後世何誠使吾之國人畏名義甚於畏仇敵通

上下為一心合中外為一家勇者請行而怯者不議其
後君子協力而小人不撓其成又安有下作而上不應
外欲為而中沮之者哉凡今之持論者有三怯者欲和
勇者欲戰持重者欲守敵且漸衰吾誰與和不足言
也試言戰可乎下哀痛之詔以示衆移和買之幣以搞
師使名義暴白如此則可以戰若陽諱其名陰喜其實
無大舉之勢而姑為小偷之事則戰未易言也三制閭
脉絡相通並衡並進使聲勢環合如此則可以戰若二

邊不動一方用事如人之身四體不仁而一臂粗舉則戰未易言也姑舍是言守可乎有張巡許遠之忠義使登陴之兵裹創飲血而不怨如此則可以守若勞役無度甘苦失均士卒凍饑而將帥歌舞娛樂軍心解體則守未易言也有羊祜杜預之恩信使並邊之民知安居奠枕之樂如此則可以守若杵築未乾驅之穿濬穿濬未已驅之營造民心胥動則守未易言也夫戰守大事也先生何不於此時與君相精講而熟訂之因以立一

定之規模歟或謂方今廟謨淵深外間莫測如陣亡功
賞暴露擣賜蓋有司細務耳而奏請累月不下況於爭
大事乎愚謂體統正則條目舉大事之不多小事之所
以不報也先生何不亟言其大者次言其小者按行兩
淮以覈軍實激擣三軍以作士氣求老成有方畧之士
與之共謀議勿使懷才抱道而有不吾以之嘆起閒廢
有人望之將與之共功名勿使袖手旁觀而有不盡用
之恨移江上諸屯之半於江北以省餽運收北來流附

之人於江南以示恩信罷兩淮土木之不急者以休民
力旌沿邊吏士之死節者以勸戰功使風采精明人心
興起開闢可以戰閉戶可以守雖以之抗新造之邦可
也況於支吾殘敵哉夫臨大事決大疑在乎擇義精立
志果而已賊未授首臣無還期裴度所以平蔡州也羣疑
滿腹衆難塞胸劉表所以覆荊州也大臣以道事君不可
則止使先生言而用則留不用則幅巾還第大節不毀
孰與得官職而失名譽者比哉某日夜念此憂思旁皇

不自知其言之出口惟赦其狂簡幸甚

戊寅與制帥論海州

某竊見楚州再發攻具令李全等進取海州某愚暗闇於事情不敢借古為喻姑以燕山之役言之自石晉失盧龍一路以藝祖之英武欲復其地不可得至宣和興師燕山再入版圖可謂百世之雋功矣方其告捷天子御正衙稱賀拜王黼太傅童貫蔡攸第賞有差未兩年燕山再陷而犄角之勢成首謀誅竄社稷隨之嗚呼前

得燕山真成不世之雋功而後禍如此今海州凋殘僅
茅葦二三十戶未及燕山萬一克城之後海無資楚之
糧楚有餉海之費憂自此始某不敢深言區區之愚為
制閫慮非謂攻城未下也政恐旦夕得城第功行賞大
使必預而後日始無詞以自解矣其事近則目前遠則
數歲是時雖悔噬臍何追古人料事雖千歲下可知猶
為百年維持之計豈以諸賢識見高古而思慮不及於
數歲之後哉愚謂不得海城雖目前無美觀然他日無

後災欲望熟察利害審擇禍福便置此事於度外萬一
楚州以捷來告宜推其功與之勿為其餘波所及若已
班師則乞明告朝廷早行下楚州收拾及今猶為可也

庚辰與方子默僉判

某初入幕朝野盛言敵衰及泗上一跌始息進取之謀
以守易戰某隨幕府至淮東見劉瑋擁兵三萬端坐山
城而維揚之兵不滿數千始喟然悟築城之害妄意欲
抽減極邊戍兵使屯次邊以壯根本其說不行至今春

敵兵犯安濠攻滁游騎已至宣化飲江某與同幕王中
甫輩至龍灣點視舟師敵旗幟隔江明滅可數於時金
陵人情震動外議以江面無備歸怨幕畫某在幕最久
得謗尤甚二月二十二日滁州圍解江面定壘三月三
日宣威轉廳丞相傳天語制帥諳悉江淮事不可去某
方敢控南嶽之請制帥使令謁告然移書光範已為求
祠蓋在幕之本末如此盱眙屯二三萬安豐屯二萬濠
梁亦不下萬人而合肥維揚戍兵不滿五千敵至宣化

非人謀乖刺理勢然也諸賢之意豈謂大將在極邊敵必不敢深入耶許俊受圍七十日不敢出於劉璋何尤彼兢兢保一城且不足欲其蔽遮江淮難矣山東事端甚微今已橫流夫復何說劉越石祖士稚乃是出門戶外就別人地盤上做工夫不該本領今日招納山東是擔錢擔米出去做事其法當有限止本欲用此曹取邳海邳海不可取遂納五萬人於兩淮把自家地盤先作踐一遍此曹名為忠義實以饑驅先殺忠義副帥沈鐸

繼稱兵向南渡門自羊家寨至鹽城寶應境內焚掠一空通泰震動主議者過捺掩護而不敢詰慢書至制司極可惡今又有濠梁之捷氣勢愈王蓋舉國聽山東自此始矣若朝廷打開門戶分曉做將去以仇恥為重成敗利鈍為輕猶云可也但高孝二宗辛勤積累之業恐難付之一擲今山東瘡口既濶諸豪復引北兵與我相聞駸駸有結連夾攻之議安知山東諸豪無郭藥師輩復生聞已有帶北朝牌號者制帥鑒宣靖故轍深知其

非第恐任責別自有人去年杜叔高獻策北通塞外豈特不通今古者發此謀哉今將帥之才極少劉琰敗衄之後別無可言許俊威名今年大減李申之就擒郭貴誠石珪先後戰死王幸只堪偏師小敵去春遇大敵幾不免向來淮陰今者濠梁之捷皆是山東人立功可歎可歎山東已納者歲費緡錢五百萬米四十萬斛在東海連水二縣者不與焉言之可為寒心

辛巳荅傳諫議

靳黃二守死事不同誠如尊諭然何憲初護齊安官吏
士民過武昌却以身還齊安固守半月城破為敵騎擁
入大江死於赤壁磯下見於安陸通判石孝淳體究申
狀如此許遠不死於睢陽且獲與張巡同傳蓋自古於
死節之士例不求疵方何憲再絕江僚屬莫之從者而
單馬獨往彼寧不知往則必死蓋知所處矣今齊安逃
死官吏士民反合詞以攻死事之守將偷生無責守死
有誅近於太史公所云全軀保妻子之臣媒孽其短者

矣疆場之事至危至險兩勢相當然後可責人之死節
漢高帝不誅守尉謂其力不足爾昔人於大勢官吏之
臣猶為之說如此况殞身喪首者哉劉韜一生從童貫
及河北死事即諡忠顯李若水悞靖康遠狩及青城死
事自吏侍贈執政諡忠愍呂祉覆淮西一事及淮口死
事自兵書贈資政立廟合肥此皆近事悞國者猶棄瑕
錄忠况未嘗悞國直以力不足抗握節而死者哉蘄黃
素無備敵十萬大入江軍二千守關皆百戰創殘之餘

其何以當所痛者赴援大將握重兵迂曲逗撓坐視二
城覆沒聞朝廷將明寘典刑是矣然死事者無恤典有
煩言何憲就如簡書所云李茂欽死守孤城不知又有
何說或言其不知變坑陷一城生靈然則究竟如何則
可某愚見始終如此未審先生以為何如

乙酉荅真侍郎

頃承大行遺誥率土悲殞念以尺書奉慰繼聞新天子
訪落召公未至除命已四五下又念四方賀書必盈几

案遂併前書不果作駛足至伏領誨翰捧對驚喜聞以此月初發仙里不知入對清光定在何日向得陳益夫湖南書謂侍郎近於心上做工夫出處語默方寸間必有成說然猶虛心下問仰見謙志悠悠之談皆不以為是但侍郎挾蓋世盛名潔身亂倫之事自是做不得逆知一出決不能免世有一種人好持高論責人僕不敢效尤姑言目前淺事以荅尊意上孝友聞天下近日之事輟朝不怡聖意可見昔永熙之世廷美貶卒德昭暴

堯明受之變元懿夭歿此則誠有可恨今故王延是為盜迫脇在朝廷宜下哀痛之詔流涕慟哭致孔懷終鮮之恨可也厚葬美謚盡送往飾終之義可也今皆未之聞焉在東朝則非鳴鳩平均之意在上則少鵲鵲在原之情萬世謂何哲廟之待徐邴祐陵之待簡王即是本朝家法誠能將明此事以扶人紀第一義也其次邊事某從前以為大將不當在極邊今併制帥在極邊矣夫嬰城固守守臣之事也提兵出戰軍帥之事也發蹤指示

制帥之事也今制帥處軍師之地矣又兼守臣之事矣
自昔制帥必居形勢之中以應接四面事機料敵而不
臨敵者也解圍而不受圍者也設自臨敵使誰料敵設
自受圍使誰解圍譬如下棋必安排數著制帥在極邊
是有第一著而無第二著也猛虎出入無常所以可畏
若棄山林而即城市則人將烹食而寢處之矣自移司
以來天下之勢偏重於一郡帳衛單寡手足盡露壤地
孤絕氣脈不接知愛極邊而不知愛次邊知防邊城而

不知防江面極非長算令盍少徙於內乎不特制帥當徙內潤帥當在維揚不當在盱眙昇帥當在合肥不當在安豐騎帥當在滁不當在濠江池帥當在蘄黃不當在浮光極邊諸郡城堅粟多只合付之郡守極邊有守臣次邊有軍帥江面有統府自然國勢奠安方今人物眇然所用皆無賴新進愚謂守臣要須得如田琳李郁輩能守得一城者軍帥要須得如李寶趙搏輩能殺得一陣者統師要須得如鄭亨仲劉彥修輩能制得諸將

下者平時既不蓄儲人才如此三等人物侍郎面上已
有幾人頗曾留意否若夫初政合行之事尚多未講歷
觀前史或焚錦繡或出宮人今未聞也或訪故老或求
直言今未聞也前日非不褒崇耆舊但隨人著少恩意
而已未嘗乞言也非不收用名場但置之禮樂文字華
選而已未嘗與之圖事揆策也上下箝結諛悅取容廟
堂之上不聞有如名公之於周公唐子方趙閱道之於
王介甫者禁閤之內不聞有如嚴延年之於博陸侯王

樂道之於韓魏公者此等風俗雖難驟革亦不願諸賢
薰陶漸漬之也天下常恨公等三數人不用今皆用矣
唐人有言萬代瞻仰在於此舉願公無改初節益進昌
言以荅天下之望某極知侍郎非愛做官職之人但魏
元忠少立名節末後不免捧制嗚咽歐公當新法之際
有宣徽使并門過闕之命韓公深憂之曰永叔莫被牽
動及聞歐公力辭方大喜呂居仁末年云好相識惟恐
其老壽錯做了陳圖南亦謂种明逸曰名者造物所忌

恐有物敗之惟侍郎勉旃某久無一字脚入都非侍郎
寄聲此書亦自懶作

已酉荅傳諫議

某竊審黼座興思驛書趣召始有安車蒲輪之命後有
內祠之除既為朝廷喜又為先生憂向使先生不見
問亦欲獻其狂瞽况謙謙之志諄諄之誨安敢不竭
愚衷以荅尊意竊謂先生有決不可出者三有至難言
者四召彼故老雖是主上初意此番廼因一從官建言

而出命一不可出也不苟合於為左諫議之初而彊起
於謝事十年之後二不可出也自古及今少全人先生
修造這裏願為天下後世深藏此璧勿使少有瑕類三
不可出也此為不出論爾出又有事在夫有立主之功
豈惟人謀亦是天數一難言也當國二十年習事多矣
而欲使之改志慮變規摹以從我二難言也禮下絳侯
尊異博陸漢之文宣皆不能免今遽以攬權聽斷責望
主上三難言也當世要務真魏略言之矣下於兩賢則

太早高於兩賢則太偏四難言也然則先生將何以復於上乎踈賤小臣固不足以知君德每聞天下稱誦堯言蓋閱古今識治亂之賢主也諸公不積誠意以感悟乃張危言以攻激諸公之誤甚矣何況上方委政大臣諸公乃於此時專攻上躬謂之不中機會不切事情可也如時事何為先生計惟有堅卧不肯起一著可以有辭於永世但力辭恩數之後恐不免有囊封手疏之類莫若為上言賢士不可逐直言不可罪彼造膝附耳之

語乃宣播於外下之失不可追矣此設鼓立木而求乃
譴怒其人上之失不已甚乎若夫忠義陸梁寢有姚襄
侯景之勢江面卑弱不及杜充王權之時識者方有被
髮左衽之憂而在廷諸臣莫有深言此事者

乙酉與胡伯園待制

高孝二祖畫淮立國守淮固密守江尤嚴觀戎帥置司
之所則此意可見矣然則虛江面以實次邊且不可況
又虛次邊以實極邊乎夫潤帥在盱眙昇帥在安豐馬

帥在濠江池帥在浮光此向者調發之誤猝有緩急盱
眙高枕而真揚橫潰浮光安堵而蘄黃失守安豐濠滁
堅壁而秣陵之人為之荷擔而立十年禍根乃在於此
執事者塊守死法莫肯變通又併移制帥於山陽其誤
甚矣近聞忠義人大掠舳艫相銜出境而去此猶虎入
人家搜食牛畜主人姑幸其去而不暇計其復來一旦
突然而至楚無兵揚又無兵江面必致震動是時沿江
制置使外何以待敵內何以固圉所謂水軍果可以防

托蒙衝戰艦果可以遏飛渡乎然則建虛名而受實禍
其必沿江制置使當之矣為今之計惟有還我帥於次
邊還統府於江面而已維揚者淮東一路之根本也合
肥者淮西一路之根本也今盱眙安豐浮光各屯二三
萬人而維揚合肥僅有些少人馬愛極邊而不愛內地
憂偏壘而不憂重鎮獨何歟蓋調發之初諸賢氣銳但
欲為摧鋒渡河之勢而不知鷺鳥將擊政不如此今者
鋒不可摧河不可渡重兵貴將塊坐淮頭智勇俱困孰

若稍徙於內河維揚實則淮東安矣合肥實則淮西安矣兩淮安則江面安矣極邊諸郡只合付之守臣仍令我帥各留統制官以輕兵守之昔人有守兵必有救兵惟今日無救兵還我帥於次邊則有救兵矣夫三軍諸將所以稟畏統帥者雖係德望亦由兵威若兵威可恃則鈐轄總管亦足以彈壓若兵威不立雖都督宣撫可得而玩弄山陽南兵萬人而北人多至十餘倍計國者乃欲以制置使虛名傲之其及宜矣歷攷前代未有開

大幕府於山陽者往時朝廷誤倚山東人為重耳嗚呼
目盜猾為忠義認羣盜為遺黎撤去藩援引入堂與導
之以北兵可以來之塗示之以官軍不足畏之狀邊帥
誤國之罪上通於天矣今忠義叛矣遺黎掃地而去矣
山陽空空一壘不知制置使束手城內制置何事哉
重兵盡在江北江面蕩無一人雖杜充王權之時局面
亦未至如此危急謂宜倚閣闢國拓地之虛談講行保
境衛民之實務罷兩淮沿江制置別於江上建大帥盡

護江淮聚精兵數萬人使自將時時以輕騎巡行次邊使次邊江面旗幟之容金鼓之聲隱然相接則姦雄不肖之心可以少殺國家必至之禍可以少紓

戊子荅真侍郎論選詩

昨承尊旨令編選詩今取百十三首作一冊申納古詩九漢詩九魏十二晉五十二宋二十一齊八梁二古詩發乎情性止乎禮義三百五篇多淫奔之詞若使後人編次必皆刪棄聖人並存之以為世戒其流為後世閏

情等作幾於勸淫矣今皆不取五言祖蘇李首句云結
髮為夫妻若俚而媒然下文云行役在戰場相見未有
期深合援枹忘身之意末云生當復來歸死當長相思
首尾皆有意義不涉邪僻班姬團扇之作怨而不傷臣
妾之誼當然張曲江嘗取其義曹氏父子所作雖非過
沛橫汾之比後世帝王筆力罕及此者太宗英偉蓋世
其詩乃似書生無復氣概水心譏貶二曹太甚此論未
公王仲宣轉側兵戈諸詩畧備時事謁帝承明廬篇意

多悲哀然孝友之情備見乎辭阮嗣宗云寧與燕雀翔
不隨黃鵠飛黃鵠游四海中路將安歸世亂憂深言近
指遠似不可以人廢張華荅何劭自謂優游卒歲矣安
知晚節之禍足為持祿固位者之戒補南陔白華二首
視三百篇固懸絕比韋孟豈不簡而勝乎韋孟太絮及
云誰謂華高企其齊而誰謂德難厲其庶而其言粹美
束生又不能道漢作近古處直是逼真魏晉以後不及
遠矣陸士衡願君廣末光照妾薄莫年君臣之際深矣

劉越石時哉不我與夕陽忽西流每讀至此常哀其忠憤不衰之志盧諶輩雖不會做事猶能上書雪主將令時賓客止會賣主盧諶豈可輕訾越石亦非泛愛借問蜉蝣輩寧知龜鶴年迺是歿而不朽之義景純明數知死非真有羨於龜鶴也陶公是天地冲和之氣所鍾非學力可摹擬四言最難韋孟諸人皆勉強拘急獨停雲榮木諸作優游自在有風雅趣五言尤高妙其讀書學古皆與聖賢不相悖而安貧樂道遁世無悶使在聖門

豈不與曾點同傳但素標挿人頭前塗漸就窄家為逆
旅舍我如當去客謂之達亦可謂之媿亦可與古詩古
墓犂為田一首欲並刪去世以謝陶相配謝用功尤深
其詩極天下之工然其品固在五柳之下以其太工也
優游栗里僂死廣市即是陶謝優劣惟詩亦然顏不及
謝遠甚五君詠却是不易之論鮑明遠詩體與左太冲
相類古意浸微矣玄暉又工於靈運登孫權城一篇如
錦人織錦玉人琢玉非年歲經緯鍛鍊不就但陶公於

短章稀句中美刺褒貶確乎其嚴而此篇押了十八韻
竟無歸宿此豈可以智力爭哉別范安成一首盡離別
之情休文得意之作也頃見阮嗣宗曹子建鮑明遠江
文通之類皆有全集陶詩篇篇可取而蕭統止取五六
篇無緊要者則諸家傑作橫遭屈落者豈可勝計某本
不敢當此差使但先生長者諄諄命之止得龜勉揀去
未必仰合師指更望為將全集仔細看過勿使觀者得
以譏議幸甚

後村集卷四十五

欽定四庫全書

後村集卷四十六

宋 劉克莊 撰

書

與鄭丞相

邇者朝廷大黜陟大廢置莫不犁然當於羣心凡前日
臺閣名流犯嚴觸諱力爭而不能回山林孤士隱憂太
息長往而不欲返者吾相秉政以來事事罷行人人收拾
昔有所謂快活朝報於今見之天下幸甚抑草茅諸生

猶願有獻焉留一鄧溫伯李邦直於內卒能為諸賢之
崇改一役法匆匆猶使小人得以藉口我公規模全似
元祐自此堅凝初志開拓遠圖純用君子無使一儉人
得廁其間力行好事毋使一事一物之偶失其理則我
公相業煌煌赫赫與溫公相望於國史矣某自幼固已
服膺道德文章之望二弟希道克遜肄業持志又獲親
炙書冊琴瑟之前憶昨試邑建陽適為要路所嫉組織
言語橫肆中傷幾逮對御史府矣時大丞相方在瑣闥

深惟國體力解當權謂文字不可以罪人謂明時不
可殺士某之所以獲全要領我公之賜也茲聆廷告
輒綴麗語且勒惡札以贄今者秉鈞當軸之慶以
叙向來生死骨肉之謝筆硯荒廢文義鄙淺惶恐
死罪

某茲以吉倅闕期逼近繫累之官行至福州承興化軍
遞至省劄某叨被恩旨令赴都堂審察驟聞成命深惕
危衷仰惟某官粵從登拜宰衡以來尤以明揚士類為

急壁帛首延於故老弓旌歷聘於遺賢莫非采當世之
公評極一時之妙選如某門蔭入仕人物冗瑣州縣奔
走無一毫可取之長里巷浮沉無久幽不改之操頃遭
讒甚愈自退藏常恐終老山林不覩天日敢謂江湖流
落之迹亦在廟堂記憶之中自非某官開誠布公哀窮
悼屈出之於溝壑抗之於雲霄則某何以有此前乎此
未知仕進之榮當泰道亨通之時獲預拔茅連茹之數
然後知其榮焉少之時未知遇合之難及晚塗齟齬之

餘忽有築臺市駿之遇然後知其難焉此某所以捧拜
公朝之誤渥尋繹吾相之大恩不自知其肝肺之激烈
涕泗之橫流也

某骨相多屯謗傷易得頃懼語既愈自退藏忽逢真宰
之登庸自撫微生而忻幸庶可仰竊覆燾俯謀稻粱敢
謂某官力援孤蹤過采虛譽疇昔既挈出於內溝之內
今茲又招延於開閣之初未上謁於翹材已挂名於除
目朝野之論皆以為我公當軸序進百官動守尺度稱

量羣才不差銖寸獨於某超院轄而為職事官躡守貳而為議幕不計資級寢階顯榮奉慈母之安輿食元僚之厚祿化饑寒為溫飽拔冗賤為高華伏惟某官此恩此德至深至重雖無奇節可効報於衆中獨以孤忠願終身於門下

某昨蒙大造陶鎔俾以朝銜就兼議幕將母携孥竊稍累月全家溫飽無非吾相之賜一飲一啄不敢忘恩惟是帥閫召除遂無依托去則有畔官離次之懼留則有

寡廉鮮恥之嫌又况庭闈每懷鄉井惟有歸投吾相改
畀祠官已蒙本司備申更望鈞慈矜允俾得以漸休故
里稍讀舊書不惟便於慈母之旨甘亦可全乎孤生之
去就

某伏準省劄令某日下前來供職驟聞朝命跼蹐靡寧
伏念某孤外小官庸常下品久矣山林之屏伏偶然廊
廟之記憐將母携孥全家就祿方愜便安之私計敢萌
僥覲之躁心第以帥既改移身無依托去未容於潔已

留頗覺於厚顏遂投化釣力丐祠廩豈謂書猶在道命
已臨門拔之泥塗之中抗之霄漢之上靡勞連帥之建
請不待孤生之歸依特加招徠倍費陶鑄某遭逢盛際
自當亟赴於弓旌感激異知尤欲進瞻於衮舄屬以親
年篤老畏暑戀鄉某與長舍弟克遜既俱蒙吾相褒擢
膝下不可無人小舍弟克剛僥倖今歲班改已注沙縣
旦夕可歸歸則某可以奔走就職矣

某自辛丑秋出嶺再叨召除再被論列擢髮數罪噬臍

省愆明知實之歲走介上我公壽某終不能貢尺牋効
寸芹豈心力不如實之哉癸卯仲冬實之僕歸返辱大
丞相先生親灑翰墨拊存危蹤嘉獎微尚父於愛子師
於高弟殆不能過某平時於敵已以下書疏登時酌
荅而況於拜大丞相先生之賜乎其所以遲徊瑟縮至
今良以無狀蹤迹尤能累人而冢卿又廢置黜陟之所
從出凡人之身豈能無過苟欲加罪何患無詞而某每
遭煩嘖必有數語波及恩地覺得謗石介者意不在石

而在富攻蘇舜欽者意不在蘇而在杜此某所以居常
恐懼惕息而不敢安者非惜身也慮為我公之累未已
也以此四年之內姓名不至釣門然兩得祠因謝時相
父子書明言某申公客也不敢畔去又與其門下賓客
之尤親者書云某除擢皆出申公實事不可諱又每語
子弟曰我廢棄於時矣汝曹世世不可忘申公亦每每
發之詩文循跡觀之書問踈於實之心懷朝宗則有甚
焉近鄭幹德言歸居相鄰日相過能言大丞相先生心

甚安體甚康趣味益深願力益弘自恨肉身不羽安得
撰杖屨挾書冊侍洛下深衣之側從鍾山蹇驢之後乎
因與德言共說大丞相先生退處十年非惟國人久鬱
周公居東之望上亦有甘盤遯野之嘆今茲睿斷赫然
時事一新我公舊學也名宰也雖欲挹浮丘而從赤松
得乎旦夕必出而圖吾君矣

某敬惟某官有大勲勞於王家發大願力救斯世嘉定
初潛之策不減魏公端平一變之功何慙涑水鴻業既

定成功弗居不待誦魏處士赤松之詩已先動裴晉公
綠野之興惟一念隱憂於宗社盍重來整頓於乾坤凡
朝夕輔台納誨之言皆疇昔尊主庇民之學少留勸誦
有光紹興趙忠簡之前聞遂拜辨章將舉元祐文潞公
之故事世方有望公亦何心某一生齟齬歲晚尤甚頃
由嶺嶠脫輓言歸囚山避謗加以親年高官情薄自分
此生不復出鹿門過虎溪矣豈料殘年復見天日璧帛
弓旌旁午四出某庸瑣何物亦蒙記憶起廢察州向非

我公造膝開陳極力薦進則空谷纍臣何以臻茲而心力困衡精銳銷歇小何以發擿姦伏大何以廉立懦頑庶幾藉手以踐前修聞人之萬一乎

某敬惟某官格天之業浴日之功兒童走卒所能稱誦某獨以涑水公用元祐止九月我公用端平僅年餘然熙豐以後無元祐寶紹以後無端平則國之為國未可知也去之十年然後士大夫有知公未深之恨明天子有用公未盡之愧安車強起溫詔苦留冠袂孤卿擁旄鄉國

備物典冊焜燿一時至於賜第京師錫帶王府先朝惟
荆公有洮河之功史相以潛邸之舊膺此異數至公則似
尊寵過之然公之心以世運否泰為已憂樂世之論乃
以外物去來為公忻戚均為未知公者何當解葱珩脫
孟勞超然物外使某輩得以追攀於半山蹇驢之後哉
某承乏將指忽十閱月望雲念母箋天乞骸尚閔俞音
反叨誤渥自量忝竊方此控辭昔出翹材今垂暮齒獨
有晚節尤當愛惜蓋嘗祈哀諸公冀為解卸鞍馱放逐

水草而悠悠不報今天下惟公緇衣之好綈袍之念終始不衰一聞某此語必為惻然動心也

某歷觀先正諸公相業雖異要必君臣如魚水之契同列如鼎餽之和然後能相與以有成富公有人望一夏竦基之於內遂至終身懲創金陵有主眷一惠卿撼之於下雖再至汜不能久惟某官則不然端平一變追配元祐社稷長久終必賴之不容而去袖手十年靈光巋然天意所屬聖上有知公未盡之愧天下有用公未盡

之恨一旦金滕啟白麻出壞局振膠紃調同堂合席者
有下殿不失和氣之美分陝受鉞者無繞牀措置西事
之憂至公血誠可以對越奮張天步康濟時難雖韓范
之於先廟趙張之於南渡元勲盛德蔑以加矣某負譴
去國狼狽出關豈無交游散如風雨獨荷廊廟勛舊之
老再訪江湖放逐之臣都人聚觀以為創見自山林之
蹟遠徒軒廡之戀深今茲翹材重開多士復業而某類
先有物推之而去所謂命歟昔李少卿身在絕漠之北

聞子孟少叔用事不覺動色豈有絲髮垂念哉士懷恩
舊情有感觸不自知其然而然某起卑溲据高華如人
夢游釣天忽然夢覺本無所喪奚足追恨獨是負明主
之知辱師臣之薦常恐沒世莫白此心舊揆予麾懇辭
未報吾相播物啟擬曰俞蓋深諒孺慕之情且欲間讒
慝之口矧霑微祿仍直小龍人知罪累之已輕自覺身
心之俱泰今而後入有辭以白其大人矣出可以見魯
衛之士沒可以從先大夫於九原矣

某自端平去國絕無再入之念去歲獲隨名節望威顏
猶震灼不自持然一對之後旬月之頃徧歷平生夢想
不到之境界躡取他人十數年躋攀不可上之官職雖
曰遭際君父然一二年間便朝暉英明揚密啓我公之
於某可謂不遺餘力矣負罪而行衆所唾棄我公獨飲
餞之又臨訪之恩意綢繆如惜其去者士懷知己中夕
上心未嘗不慷慨泣下也顧佩服承君道卿之訓一字
不入帝城耿耿此心我公必垂察焉某自聞黃麻告廷

喜而不寐然為宗社喜為善類喜為天下蒼黔喜又為先生憂他人當國於安閒之際先生得政於兵革之後某之所以憂也昔仁祖再相富公公謂歐公曰弼頌為人所譏今必顧慮不若堅守前志竊觀近事愈加謹重豈非有所懲創歟溫公天若祚宋之語固竦然守道在已成功則天亦名言也某昨在講筵每因燕見必進辨姦之說言語比諸他人尤為苦切我公試質之於上必尚記憶反受畏禍摸稜之名寃乎哉玉音鏘諭使為平

詞某不奉詔自當誅矣安敢更播之於外進不敢枉道
退不敢潔名所以竭小臣之忠愛報明主之知遇也奏
稿具存天下後世必有知此心者前揆知某決不能出
漫畀左符方以辭免未俞為苦一旦我公提筆俯察至
情美職真祠不禱而獲所以保全某晚節末路者至矣
盡矣自我公再持魁柄當世士大夫以至朋友親戚皆
意某死再然某獨謂宰相當收拾天下士豈私於門
下客乎某老矣願如种明逸歸華山楊大年歸陽翟不

願如石守道蘇子美累他杜富二公也祠請既俞識與
不識皆曰士子知止皆曰吾相至公然則某之不出要
亦有微助於廟堂矣

某準省劄一道除某宗正少卿寵光遠逮感涕交零某
竊惟當世賢士大夫不合而去者多矣或往而不復返
或久而後收獨某甫去國即除職予麾甫辭麾即晉
職奉祠甫食祠即起廢為卿中外之論皆謂某何人乃
辱聖君賢相記憶如此拔拭如此拔擢如此猶記端平

初趙履常由小蓬遷此職某視趙無能為役而序進乃與之同可謂極書生之榮遇矣某厭退閒而喜進用特甚於他人放逐以來闕庭翹館常在夢寐自當奔走而就列豈敢裴徊而控辭實以老親八十八歲母子相依為命跬步不容相舍臨漳近在五百里內尚不能往區區情實去歲兩申朝省言之悉矣謹具免牘一通專人詣光範門投獻欲望鈞慈特賜敷奏亟收新渥俾奉舊祠使士論皆曰先人老母有辭官養志之子亦曰安晚

先生有招而不至之客某死且不朽

某四月初再具免牘未至間共領三月末鈞翰一通丁寧告戒勉之一出且知聖上曾問小臣何時可至某自幼識字即知不俟駕之義安敢稽留君命徘徊顧望況在列諸臣或以科目或以才學自致通顯惟某無科目而錫第入館無才學而侍經掌制此身秋毫以上皆君父之賜而吾相之恩也神馳魏闕夢繞翹館肉身無翼恨不奮飛實以偏親垂垂九十目昏足弱卧起痛楚須

人扶掖每朝暮上下牀呻吟殆不忍聽常在膝下則喜
出稍久則尋覓一郡皆知君親一致忠孝一理設使某
知慕君而不知慕親能為臣而不能為子通國議論譁
然而起被以匡章子之名是時吾君吾相雖欲保全不
可得已區區丹赤具如前申欲望鈞慈更賜敷奏先為
某摧謝聖恩次及親年大耋行而迎舍而去皆不可之
狀陛下至仁必惻然從欲矣

某七月十二日承本郡遞至尚書省劄一道奉聖旨

某除秘閣修撰福建提刑者洊渥異頒深惕危衷論
譔之職素高舉刺之權尤重矧鄉部未嘗輕畀在前
修間有此除如某昨迫親年力辭卿列但欲避匡章
子之謗不知犯防風氏之誅荷君相之寬恩需牧守
之遠次謝牘未登於翹館除書復下於窮閭便家庭
綵戲之娛動閭里繡行之羨九族相語一城聚觀皆
云吾相之維持諸生有甚慈親之顧復愛子丹心激
烈雪涕滂沱某粗從師友聞理道之言素與鄉井無

此芥之隙萬萬不至於夸詡得意報復任情以孤使
令以辱啟擬第貼職峻恐物議未允占籍近亦令甲
所禁當辭一也先朝如蔡君謨林子方皆以忠直有
節操嚴冷無面目被選某為人欠風力臨事少決斷
預有疲輒不勝任之憂當辭二也既具楷牘一通復
齋戒薰沐勒此惡札專人捧詣政事堂欲望鈞慈特
賜處分

與喬丞相

某伏準勅劄差某主管華州雲臺觀不由祈請實出記
憐切自省循第深感懼某頃繇凡品擢預俊游獎遇特
殊謗傷交至及收朝蹟尚忝州麾疚心未補於前愆擢
髮又遭於新劾益以書生之習氣不量事體之重輕輒
因對揚冒獻狂瞽孔門惡許以為直漢法誅非所宜言
以至流傳尤乖恭謹咎雖已往罪則如新仰荷化鈞止
收郡紱某於是銷聲息影甘為聖世棄人矣叢祠之命
飛落九天自昔名人多有一斥而不復者如某庸瑣何

足深惜今也朴而起棄而收倍費大丞相造化如此磨老之母襁抱之孩歡喜相告感涕交下

與李丞相

某伏準九月七日省劄除某江西提舉逖聞誤渥戰灼靡寧伏念某一介孤寒三年間廢蹤跡久淪於畎畝姓名不至於廟堂朝無更相稱譽之交身負不敢辨明之罪居常循省合永棄捐不自意真宰登庸羣才奮起顧如困躋亦荷記憐擢諸祠官授以使指不由寸援盡出

至公他人棄逐之而吾相招徠之他人廢錮之而吾相拔用之仰惟某官天地父母之恩何以論報捧戴除目感涕交流惟是江西名部監司高選恐非庸瑣可副使令謹因省遞之回輒露控辭之請欲望鈞慈特為敷陳俾安愚分

粵從某官爰立以來國人之論以為廉如公儀休公如孔明敏如李文饒好賢樂善如崔祐甫裴垽而又持之以正鎮之以重凡天下第一義皆欲舉行當世第一流

皆欲收拾雖其間或制於獨斷沮於通言然海內蓋已諒我公之心矣觀其黜陟百官進退羣才苟有可采雖有嫌且憎亦不終棄如其不然雖親且暱未嘗超用有上書投贄守門而不省者有掃迹滅影相去千萬里而見收者某嘗妄謂他人為身計故分門庭立黨與我公為天下計為人才計故泯恩怨包同異昔在韓范用心實然惟先生足以繼之方當內建皇極外靖邊塵守國家制度紀綱之舊延江表禮樂衣冠之脉煌煌相業與

宋匹休某罷郡未久奉祠未滿杜門訟過絕意榮望忽
準省劄除某江西提舉謬叨進擢第切驚惶伏念某以
甚庸之材負不韙之罪每與二三子者恐怖循省慮有
後禍自吾相當國然後喜而相告曰罪或者可以已乎
山間林下所望不過如此至於杖拭之甄錄之本無此
念亦無此夢何者解雷霆叵測之威一難也和鼎鵲難
調之味一難也韓公不能援尹洙富公不能雪石介又
一難也今大丞相先生之於某犯三至難著一轉語遂

由祠廩徑昇清華他人欲廢錮其終身吾相獨哀憐其末路此生有限此德無窮王通有言通於夫子受恩罔極韓愈有云死於閤下之門無悔也某於先生亦云

某昨蒙陶鑄江西庾節已兩具稟牘摧謝惟是聞命之初雖以從弟希仁同在一路為疑然遠方尚未知希仁被論將謂需次故控辭申狀止言資望輕淺不敢以兄弟妨嫌為詞十月下旬忽得舊吏附至十月初七日省劄一道前備某自述後載改除指揮伏念某一介孤寒

旁無寸援旬月之內兩蒙某官啟擬甄錄倍費造化如此大凡自江浙入廣則為遠自閩入廣則良便蓋鈞意深念某將以恤其困窮安其杌隉雖使某自擇何以過此矧蒙威命令不得再辭令疾速之官罪廢餘生一旦進用甚超臨遣至榮跪受除書感泣不已東廣仕者多為風俗所移鮮能自潔某愚無他長此行但當蘄食水飲以革貪濁銖積寸累以裕財用庶幾不負公朝選使之意不至有累吾相知人之明而已亦可圖萬一分

之報也

與游丞相

某伏準九月七日省劄除江西提舉驟聞誤渥戰灼靡
寧伏念某粵從罷郡還里自知罪名最重姑以藏形匿
影為幸都無復玷起廢之想天日在上實知此心諸公
間並不敢通書歲一再寄聲於釣門問寒暄而已敢謂
某官主盟公道軫記孤生方在從班有祠廩之授繼在
經惟有史筆之薦及居廊廟力賜陶鎔擢諸徒中授以

使指生成卵翼恩等所天雖甚頑冥敢不銜戴惟是江西名部監司高選恐非凡陋可副使令謹因回遞輒具免牘欲望敷陳俾安愚分某因有忱懇敢私布之某曩因詩案不調十年晚遇端平暫出復處以清談妨世法猶未害也因拙宦耗生計中年始受其敝矣今冬男冠女笄家火寢迫環堵蕭然若蒙某官造化之力辭不獲請遂可挈家就祿陳湯逋貸向平兒女庶乎有所指擬矣更乞常以鄙言寘之鈞抱如做文字之類某酷所不

喜蓋素無科第只合依本分做官若位置一差犯衆怨
忌為世僂笑是某官愛之乃所以禍之也豈若在外面
做粗官有俸祿足以仰事俯育哉

某伏蒙鈞慈寵賜古律詩一編若以為孺子可教者某
即屏人事細讀旬日述懷八首體大而思精詞嚴而義
密成已之餘推以成物光芒燦然與朱文公感興之作
相為發明者也蓋某嘗為人子矣讀東下自訟生日感
懷之篇而後知承順之道未至嘗為人夫矣讀故囊之

什而後知伉儷之誼未篤嘗為人門弟子矣讀與後溪
父子諸詩而後知師友之際有可愧者嘗為守令矣讀
臨民本經術之句而後知政事有未善者至於以自修
為未足欲朋友之夾持以獨善為未足欲頑鄙之皆化
所謂與人為善者也分人以德者也及云去草寧容緩
滋蘭未厭多又云不然沸鼎中可復加煎烹自昔能為
此言者鮮居此位相公今居此位庶幾可以行此言矣
昔葉水心常云洛學起而文字壞此論傷於激如游楊

胡文定父子文皆極工意者水心未之覽耶向使水心及見相公四百七十五篇必悔前論韓子謂仁義之人其言藹如前輩亦云淵明不為詩寫其胸中之妙耳某妄謂相公句律尚可求之紙上若夫滿腔惻隱之心一團冲和之氣學者烏能彷彿乎向來彼相求之先生囊橐不輕出某賤且廢於世而先生辱教誨之既已襲藏巾笥傳示雲來敬勒短札仰謝私淑因有無厭之請某以序攷之此編之外雜文凡三百五十一篇蓋興寄在

詩名節在奏篇言論風旨
在記序題跋策謚之屬叙
事在誌狀游戲翰墨在駢
儷某所見者詩耳宮牆之
高宗廟百官之富某竊不
自揆願卒受業於門惟相
公幸矜許之某茲者伏審
擢從本兵進輔大政真儒
無敵吾國有人伏惟慶慰
日者鄞參去東府虛我公
杜門謁告視大位若將浼
以聖上察其忠實嘉其恬
退而就拜焉蓋舉國以聽
公矣某前引鄞侯有所開
說良以其人本不欲婚而
人主強之婚本欲不宦而
人主強之宦惟其滋

味薄而嗜慾少所以人主別作一眼看待今我公亦無心於富貴庶幾諫行言聽膏澤可下於民矣

某前蒙誤恩畀以江右庾節其時猶未聞希仁參差謂是待次故辭免狀不敢直以弟兄同路為辭前月末聞某辭免之命乃知己荷公朝易節東廣大凡自江浙入廣則為遠自閩入廣則為便矧此闕在淳熙間以處楊廷秀林子方某何人者而廟堂俾繼前修後塵顧雖駑鈍無以愈人至於藥食米飲以革汙濁銖積寸累以裕財

用差有一日之長異時解印而去使廣人皆曰是能潔
已奉公者即所以報我公之知也但有一說不敢不預
以告如作文字之類某實不願如此位置不過又為人
彈射饑餓至死耳如八十老親何如四兒一女何惟某
官終念之人情各有便不便某便於外不便於內區區
血誠梵志倒著戰之說也併發玉齒一笑

某首春十六日準省劄除侍右郎官此皆某官念舊之
意高憐才之意切因元會之除吏以孤官而竄名恩德


甚厚親朋咸喜而其獨以省愆未久起廢太驟為憂方
遲免牘之回已有嘖言之及尚從寬典仍畀叢祠某死
罪死罪凡人負譴必有罪名使天下曉然知之惟某所
坐最為黥黥不明今年之劾曰圖作南宮也明年之劾
曰圖作西掖也其惟國朝清望官選於高科異等而不
選於任子選於館閣而不選於俗吏流品既異塗轍亦
殊誰倡此名鑿空架虛嫁其禍於米鹽之俗吏蔭補之
庸夫此言流播非獨某之恥也其羞朝廷辱縉紳甚矣

蓋避之嶺海不得免焉避之田里不得免焉待之十年
之久而不得免焉其實雕篆纂組童年所嗜今將耳順
一字不記而惡名著人如膩不可洗濯如癩不可熏沐
每自傷悼曰身不死謗不止烏辱冤哉又自寬釋曰聖
上數路以取士大臣不以一眚而廢人罪垢餘生苟未
奄湔但當掃去浮華斂歸平實以待清議之見察而公
朝之不終棄耳某屏居卻掃山深林密踰年無一字至
釣門獨有巖巖泰山之瞻朝夕不替去冬聞經筵之召

俄又聞事樞之拜昔李少卿墮落異境絕望天日及聞霍子孟諸人用事不覺動色某亦人耳其於相公之入也烏能無鶴鳴子和宮動商應之喜哉顧念為國計則當勸勉一出為公謀則當從吏勿行賀書瑟縮實以此故既而傳觀異牘至於十數凡小生所欲忠告在明公畧已盡言然而上迫趣於惟行之令下牽絆於同朝之賢則又有不可以常法論者曰本兵曰大政他人一著脚此地必根著不肯去惟相公昔也先諸老而去今也

後羣公而來視荆公晚拜頭廳不辭而至者賢之遠矣
某舊臘叨恩起廢念既有免牘申省不敢不通諸府書
承受人言相公未至遂先作二揆書今以錄本申乞鈞
覽願相公因與二揆議政採擇而施行焉幸甚某在南
中常告相公第一不喜做文字今甲子將一周豈是弄
筆硯時及相公諸君子當朝寒士得職之時隨分在外
遷轉一兩任畧改換十年前官稱即可納祿奉親修身
俟死以從先大夫於九原矣過此若有他望天厭之天

厭之



後村集卷四十六

欽定四庫全書

集部

後村集卷四十七至

詳校官庶吉士臣吳烜

主事臣呂雲棟覆勘

總校官進士臣朱鈐

校對官主事臣陳文樞

謄錄監生臣馮堪

欽定四庫全書

後村集卷四十七

宋 劉克莊 撰

書

與游丞相

某恭惟端嘉以來上之圖任非一相相之登庸非一人然皆不出長安城致身高位者惟某官不然始在朝廷以不合去後得政又以不合去其視榮利如涕唾然天子固已尊敬而注倚之矣名最高迹最近召最早來最

遲公之素心蓋如此一旦聖意先定告廷爰立仕者舉
笏曰吾輩有宗主矣耕者擊壤曰天之欲平治矣人心
不齊天籟自鳴此豈可以聲音笑貌求者方今急政要
務曰君德曰國本曰朝綱曰邊防他人所不敢言與不
能為者竊意吾相必以身任之某獲罪鄣揆退耕于野
有千百億劫不下山之誓且奏記釣門曰此生索性待
公當軸安知今日其言遂驗孟子不寐謝公折屐未足
以喻喜也然晚節末路曲荷陶鑄內陞朝序外擢職名

就其分劑言之千足萬足今無所欠只是反哺情切欠一歸爾吾相昔有牽掣今造化在手為某解卸鞍馱放逐水草使為太平之幸民可矣

某初五日準省劄奉聖旨某令赴行在奏事成命驟頒危衷憎悸伏念某素無扳援積困中傷但思空谷之逃不作修門之夢然且起久廢而居按察微寸勞而忝褒遷取數過多乞歸未遂敢圖收召俯及沉淪孤忠荷君相之照知遠跡煩朝廷之記憶恩私所逮感涕交零某

之孤危人所共知及其官當國密勿啟擬不進不休迨
茲出命倍費造化某以十年之戀闕當倍道而造朝况
明時豈易遭逢而近比不許辭免但於某私計則有未
安蓋以六十之兒上有九十之母前謂番陽去鄉差遠
力求祠廩或改閩郡天日在上實聞此言設若貪仕路
之向榮望親闈而愈邈既犯天下之公議亦為名教之
罪人輒以丹忱形之公牘欲望鈞慈特賜裁酌或尚可
敷陳改畀一麾不惟母子榆暮相保亦某官加惠諸生卯

翼成就之初心也

與范丞相

某十二月二十日承本貫興化軍遞至省劄奉聖旨某
除江東提刑聞命震駭莫測其繇因念去歲被論畀祠
嘗勒惡札短啟推謝猥蒙鈞慈親洒荅翰諄複溫厚固
已默寓哀窮悼屈之意及茲旋乾轉坤造化在手首蒙
啟擬不待歸依拔諸散地之沉淪付以外臺之雄劇此
乃在朝卿監郎官所欲求而不可得者某方在廢錮安

敢有此夢想仰惟某官啄抱卵翼之恩可謂勤矣某先
白家廟次告親闈聚族百口一詞銜戴某筋力尚堪驅
策向者不殫入廣今江東距閩為鄰部况一閒四載寧
不急祿實緣孤危一旦吾相當國復玷太驟深慮微蹤
又將不安謹具免牘一封歸命化鈞冀請誤恩敢乞鈞
念速賜處分

某今月念六日準省劄奉聖旨某除將作監驟聞成命
載惕危衷伏念某昨開戶而投閒未磨瑕累茲起家而

司臬無補涓埃事功繆悠風采消靡養親有請方
賴曲成播物無私忽叨峻擢由郎曹之秩序陞匠
監之班聯必王官積累而後遷豈外臣夢想之敢
到仰惟某官振淹拔滯之意超資越錄之恩雖殞
微生莫酬洪造但某自揣孤危而多畏每因召用
而挺災况新命之過優慮僉言之未允見具免牘
仰干化鈞

某前月二十九日因繳遞筒嘗具稟劄退而屬藁擬辭

匠監之除忽得邸報聞已改命惕息以俟至十二月十一日伏準省劄某除直華文閣依舊江東提刑某竊惟大匠穹班以待郎官之久次先朝奎閣以旌監牧之有勞豈伊名論之卑凡併沐寵光之殊異旁觀歆豔內省兢惶此皆某官記夾袋之儲篤縉衣之好解十年未易解之謗調衆口至難調之言回白日之照於覆盆息慈母之疑於投杼遂令踈逖坐致顯榮永惟吾相此恩之尤深雖盡今生來世而莫報重念某自收朝蹟屢閱歲

華前此當軸數公貼書盈篋或便朝之密薦或廣坐之
誦言徒有空言孰為實惠某亦固窮而自守不少屈而
有求及某官登冠元台兼收多士因鈞問之下及竭鄙
情而上訴者恃吾相道廣而無黨偏也心平而無恩怨
也恃吾相之追念長公而未忘先人也某官雖愛之深
主之力然前後所賜鈞翰未嘗少見幾微一旦榻前啟
擬中書秉筆乃超資越格出人意表如此乃以朝士積
日累月而不敢望者度外拔擢之如此乃排羣議而一

手挈提之如此身可隕恩不可忘昔王文正公擢士而士不知其言曰恩若已出怨將誰歸誰其繼之某官一人而已某初意實以親年高家山遠清溫既隔夢寐不寧欲辭繡斧之榮復返綵衣之樂冀將見祿換一虛稱以華歸塗以全晚節今為身計者皆遂為親謀者未諧仰戴洪恩之曲成俯畏清議之責及望翹材而矯首具免牘以陳情敢丐鈞慈特賜處分

與范杜二相

某仰惟聖天子一旦躬攬大權枚卜羣公以相印屬之
真儒莘渭之舉也制麻一出學士大夫至於舉笏相賀
文富之拜也然今日之事至難今日之相尤難大丞相
登庸之初將慰人望必痛革時弊必先收人心請試條
前日之所以失人心者以備採擇自昔朝廷必長養士
大夫氣節而成就其聲名比年號敢言者著清節者賢
而有人望者功名與已相軋者皆為一說以沮之求一
罪以加之曰是空言無實也是嘗誤某事也是嘗主某

人也甚者毀其素履如溫公狎妓東坡販鹽之類初年
有三十餘人之薦其後取三十餘人者芟夷而蘊崇之
皆掃影滅迹更用一種刀筆俗吏聚斂小人或瑣瑣姻
婭以根據津要布滿郡國一當革也自昔立賢無方比
年乃拘鄉貫因惡一夫遂惡其類因惡其類併惡其鄉
喜者擢連粉榆憎者固其州里夫惡閩士如呂吉甫輩
可也不有蔡君謨陳述古乎惡蜀士如鄧綰輩可也不
有范景仁淳夫坡穎兄弟乎二當革也孔明所用皆已

蜀人才國家駐蹕既未能混一西北銓選科舉多得閩
浙之士理勢則然今進退人才者曰吾惡福建也典掌
文衡者曰吾抑閩浙也昔了翁彈蔡京云重南輕北分
裂已萌况版圖日蹙又於已蹙之中有所厭薄何其甚
不祥耶三當革也分門庭植黨與非盛世事比年以由
我而進者為賢由他人而進者為不肖夫了翁非曾子
宣所引乎道卿非呂嘉問所薦乎謂鄒陳不受知於曾
呂則不可謂為曾呂之黨尤不可烏得以其始進議其

終身四當革也取鹽袋錢變經總制法而守倖壞增斛面刷義倉而田里空括浮鹽而盜賊起奪天下利源歸國用房而版曹幾廢先撥邦本大失民和此其行事當革也自昔為國必有魁磊骨鯁之臣淳化景德間以王元之楊大年重慶厯以四諫重熙寧以三舍人重元祐而後以元城了翁諸人重比年居緊官者一則譽真宰之圖回二則贊世臣之把握至於事關綱常名教之大相視禁斷莫敢發口向非諸生獨言講官密啟國無人

吳公卿大夫不敢論諫亦不敢駁議乃以据撫細微為
守法以沮抑孤寒為奉公除堂參部者魚貫客邸或饑
餓而死狼狽而歸起道塗之怨嗟傷祖宗之仁厚譬如
巨室積善起家一旦衰微為子孫者不思力行好事增
廣陰隲而一切反以鏤薄欲家之肥恐無此理此其大
意當革也至於格非去佞之機括內修外攘之次序大
丞相固以身任而無俟於人言矣昔人有云千人之諾諾
不如一士之諤諤自吾相宅揆秉筆之士作王褒之頌

獻徂徠之詩者必已堆牀盈几然而未必皆有益於吾相也某懷昔受知之意與今起廢之恩既自課一啟為天下賀而啟所不能言者又齋沐裁為此書少効芹曝之忠

與宰執

某昨者叨恩入奏嘗具尺牘少伸推謝共想已塵電覽某賤迹行至泉州聞有臺劾歸至田里方見彈文罪惡如此宜肆市朝以為世戒而明主寬洪大臣長厚不忍

加誅賦以祠廩雖進莫望天顏於軒陛然退猶躬子職
於庭闈仰繫廟堂委曲全護之力寸心耿耿寧不知恩
伏念某去國六年之久而又游宦萬里之外本為公論
所恕止緣某官獎譽過當汲引尤力及茲收召果觸危
機某少時雖以章句小技浪竊虛聲年將耳順憂患摧
壓耗忘都盡常願歸耕以全晚節大臣欲進擢之見其
盛壯時也言者遽攻擊之亦見其盛壯時也向使大臣
知其捐書情學必不仰累生成言者知其倦游念歸必

不重勞驅逐也凡此皆平日於踐履上欠功夫文勝質才掩德之所致反覆循省無所怨尤但當改已往之過勉方來之善庶幾上不辱殊知下不羞先訓他復何言

與高樞密

某歲首奉準省劄除侍右郎官皆某官陶鑄啟擬之賜矯首知皈某自度孤危必生悔吝即具免牘力言恐懼瑟縮不敢就列之意俄聞又汙臺評矣尚蒙寬典仍畀

舊祠某死罪死罪伏念某莆之鄙人二大父知名乾道
間先君諸父皆擢世科惟某幼而失學門蔭入仕當世
耆舊猶以其故家遺俗多所獎進絜齋侍郎袁公竹隱
諫議傅公屢薦於朝不報西山真公帥閩以議幕招內
史洪舍人初除以自代舉蓋諸公假借之私而非天下
議論之公也立朝之初衆以為喜獨以為憂未久果逐
起廢守喪數月又逐後除廣鹽某官以麟史之筆當鳳
閣之制推本其家世師友次及其奏對議論王言一出

多士盛傳衆以為榮獨以為辱未幾召則逐除郎則又
逐訂其所坐別無過犯亦無贓私專云欲作文字官而
已魚鳥至微猶懲弓餌某亦人耳端平之劾此罪也嘉
熙之劾此罪也淳祐之劾亦此罪也一何冥頑不靈久
而未知悔悟哉況夫朝廷之大科目之廣乃使一米鹽
俗吏實受此名豈特某之恥其羞當時辱後世甚矣某
弱冠筮仕今將耳順於獄訟米鹽粗有一日之長區區
素心願以絲毫實用自見不願以文字受知於人廟堂

苟不遐遺筋力尚堪粗使豈必加屨於剛施髭於僧食
馬肝而俟河清乎良由某命運窮薄為人鑿空嫁此惡
名尚賴天子聖明大臣忠厚使從間散以避怨憎殘年
幾何但當內訟而自新固守以待察耳

與郭小坡

某伏念端平甲午起下土登周行忝與當代名流同一
除書萬人海中雖不及款侍誨言然望而知為吾叔度
也明公如鸞皇縻之不可某如鳥鳶彈而後去每懷清

標想高致未嘗不起敬起慕天日實照臨之某敬以某
官平昔樹立見謂第一流人一旦進居言責國人皆喜
而相告曰是必能與天子宰相爭是非可否者是必能
判別忠邪者是不可以官爵誘利害怵者及諫紙一出
則又喜而相告曰正論明矣佞人去矣人心不齊天籟
自鳴誠之不可掩如此前世小人害君子或興黨禍或
設學禁各為一說以掃空其類至於妄引經訓倒植綱
常禁人不得說天理民彝則自生民以來未之有向非

明公正色闢之萬代謂何韓愈有言孟氏功不在禹下
某亦謂正言之功不在孟氏下自此序遷諫大夫中執
法天子盡行其言天下舉被其澤矣某初元召審行至
三山願留西山先生幕府蓋自審不堪立朝爾牽聯一
出非本謀也師死不去或者罪之所以有丙申之逐又
掇拾師之緒餘見之對揚或者怒之所以有丁酉之逐
齒朝年餘典州數月謗咎山積退而杜門自分老死田
里矣然猶孤危凜凜不敢自保及聞朝陽之鳴然後與

友人方石史私相語曰上用端人吾輩之罪或者可以已乎矯首雲霄不忘瞻戴

與吳叔永尚書

某丙申去國獨荷尚書與洪文端明聯騎訪別歲月易逝昔未知命今耳順矣張公九尺之身翰林萬丈之文何嘗一日不在心目楊右司在郡時每欲附拜尺書又念得罪少公而登門未已雖合於善論將不吾與強而附之然恐非君子上交不諂之義况傳云親戚不悅不

敢外交近者不獲不敢求遠竊意尚書篤於友愛非但
某不當自通而已前和高詞末章所謂洗空者即是采
用退之聽琴之語韓與穎師豈嘗有纖芥哉妄意謂尚
書樂府之妙不異穎師之琴實無他腸粵自高牙大纛
作屏洪都相距僅三百里豈不欲修書札問專城瑟縮
至今猶前志也敢謂大君子高懷曠度超出古今精筆
妙墨俯逮卑晚捧得驚喜如蔡邕之得論衡辯才之獲
楔帖而今而後尚書既無訑訑而拒之色某安敢不源

源而來乎端平從官皆已秉事樞惟尚書猶以直學士
臨大方面向者尚恐當軸未相乎果山既相道同志合
聲應氣求竊意旦夕必間兩社矣某宦情薄親年高去
春為范社二公好語牽挽一動非所樂也自去春屢告
果山力求清漳以便養親已有陶鑄消息矣聞直翁辭
越亦求此州遂失指擬臬事書考又踰兩月已除陳叔
方為代但此距永嘉千餘里猝未能至天氣尚熱觸熱
奔走其何以堪凡人皆有劑量某門蔭入仕內至郎監

外至麾節劑量極矣更求毫芒之益是乾沒無已時嗜
進無止法也以此力辭入奏不足陳於尚書之前比聞
令嗣知丞不起妙年玉樹脆折上慙慈抱誠何以堪然
斯文命脈繫於元身更望玩老易齊彭殤使之漸遠漸
忘可也

與鄭邵武

疇昔親炙每聞餘論謂他日必官君瑞明府之子以報
大監罔極之恩某與子敬左司聞而歎伏邇來不意此

說稍斷續莫曉其故豈以君瑞既歿而寒盟耶閣下為人磊磊落落不忍如此意者婦人女子有以動搖之耶或宗族親戚有來破之者耶吾輩處大事當斷諸心豈可謀於人閣下之官受於大監能為此舉止只是常情非卓行萬一不能然閣下許多英風誼概晚節掃地盡矣當大監奏任閣下時君瑞雖已登科下面猶有三子舍子任弟是托孤於賢弟矣今大監直下遂無齒仕版者手足之情寧不一動心又憶君瑞在時事叔父如事

父令叔父以他人為子孫而擯大監子孫於門牆之外
某心猶覺不安於閣下心安乎知此事始末惟子敬與
不肖子敬逝矣非不肖誰啟發閣下者傳曰使死者復
生生者不愧其言然死者無復生之理生者見有死者
之時吾輩壽非金石此事不早定他日閣下何以見大
監某何以見君瑞於地下哉去冬運管顧兄席上曾開
其端閣下頗自感悟別後不知又作如何商量凡人奪
嫡謀宗無所不施其智巧若不以大義自裁斷而囿於

他人智巧之內未有不顛倒錯亂者曷不隱之於初心
采之於公論乎又聞令嗣新除學士力主君瑞一房蓋
其才雖不足以望嚴君而其德宜為正人之子矣敢拜
手為閣下有子賀惟閣下反復愚言而處分焉此事於
立孫無相妨華屋良田與吾之孫獨以一命與吾兄之
孫兩得其所矣某言之閣下行之人必曰潛夫景輔之
益友也以道義相期有過必規某不能言之閣下不能
行之人必曰潛夫景輔之狎友也平時酒食游戲相追

逐而已如景輔晚節何不覺因書悉吐露之知我罪我
席藁以俟

荅南雄翁教授

僕端平初為郎與直翁侍郎徐公同舍相好也南來得
侍郎書誦足下及河源令君之賢侍郎素強直不輕許
可不待覩面固已心敬矣便風辱書陳義甚高委教甚
富益歎侍郎取友之端而恨僕納交之不早也人情喜
面諛雖至親骨肉間猶有隱情足下於僕風牛馬不相

及而意氣傾倒攻瑕指疵慨然以訂頑砭愚自任推足下之心將以其美諸身者而淑諸人也僕雖懦怯敢不佩服然足下所以教我是也其所以自處非也自昔聖賢著書立言者多矣曰百世以俟聖而不惑曰後有子雲必好太玄是當時之人皆不足以知必復有聖賢者出然後知之知不知聖賢之書與言自若也今足下之詩幽然以深其文困然以長而又頗自貴重知者尚寡足下以知者之寡也遂有望當世責時人之意望知者可

也又望不知者焉責故交可也又責素昧者焉足下論著如此意其中必有充焉自得者而又据科第為師儒曰不遇何至遽效阮籍之慟唐衢之哭哉嚮使足下徒步取拜相白衣入翰林其足樂乎否也僕他无以愈人但遭詩禍以來灰心仕進其後復出非心思巧力所能致也然懲艾益深謹嘿益甚天真益斲喪足下當責其栖栖為佞而反譏其皦皦難全乎噫足下所責乃故我非今我也僕立朝逐於朝補郡逐於郡起廢乘使者車

僅數月爾所得俸賜斤斤然事育之不足何以致珠履而供車魚乎足下引四賢之事以相勉彼皆立名譽建事功於當世者之所為也僕力不任此故當付議論於當世爾況黃卷之中皆吾師友四海之內皆吾兄弟僕之學何嘗獨而黨何嘗孤乎聞當撤棘倘肯過訪不惜面商確也

荅林公揆監場

僕與足下同里閑又與賢冰翁南宮舍人接交游聞俊

聲仰下風之日多矣顧壯老不相謀銳情不同調常欲
親炙而不敢自去歲至今足下以所著易學及詩文教
詔之者三以書開曉之者亦三時先親已病僕之方寸
已亂曾未一酬荅而大禍至血氣摧傷性靈顛錯十事
九忘不可以人理責而足下尚復不棄勵以前輩居喪
講學之事誠足下待朋友之厚望朋友之切然僕豈其
人哉昔人有云人言當指實寧可面諛僕少時讀書粗
了治亂成敗未嘗窮經析理為文字多諧世趨俗而少

古意前諸老過聽荷聖上誤知猥以文史叨進用及侍
邇英力以不通經辭迫於威命每一進講面汗心愧然
後知學力如弓分寸不可勉強也足下之所以誨僕者
易學也詩文也僕於易或未能分其句讀豈能索其精
微哉理學至伊川數學至漢上亦云至矣然考亭已微
與二家異鶴山又微與攷亭異南塘虛齋皆求新義於
諸儒未發之外皆以其說陳之旃屢雖貴為侍從加以
明主稱制臨決而承學之士未之能信然則足下之詩

縱使南塘虛齋見之明主之力皆恐未能剖鑿一世之
聾瞽統一羣儒之議論如僕庸瑣何足以贊美其萬一
乎諸文惟有韻無韻之作為近古偶儷為俗似不必苦
求工然不工又不可讀先朝孫明復胡安定俱以經為
人師曷嘗有一篇文字行世哉攷亭論荆公東坡門人
取呂吉甫而不取秦少游輩其說以為吉甫猶看經書
少游翰墨而已足下既為易學占得地位已高而又欲
求工於文無乃反自狹小自卑陋乎足下又條易學數

端俾區別以對若主司策進士之為者僕聞程氏將沒
自言易傳只說得七分足下以程氏之傳為然耶當補
其三分之未發者可也以為未然耶當自為一書藏之
名山百世以俟聖可也上起鄭康成王輔嗣韓康伯下
至鶴山南塘虛齋諸家之說當以程氏傳為準可也茲
事體大他日足下學成書傳僕此膝雖不屈於他人將
為足下屈矣

後村集卷四十七

欽定四庫全書

後村集卷四十八

宋 劉克莊 撰

行狀

有宋朝請大夫直秘閣主管亳州明道宮林公
行狀

魯祖格故將作鹽簿贈通議大夫

祖適故龍圖閣直學士贈少師

父挺故奉直大夫除知沅州贈金紫光祿大

夫

公諱瑒字景良世為福清人學士忠節著於朝廷沅州清德稱於州里公少入太學與兄靖安令君璟今容州使君瓌同中淳熙十一年進士第而公臚唱第四場屋以為盛事教授鄂州舊例從州家丐猪羊稅錢助養士公曰事不可愧耶謝不取節縮浮費更有餘力增田差幹辦江西轉運司公事丁母卓夫人憂服闋差幹辦浙西提刑司公事丁沅州憂服闋幹辦兩浙轉運司公事

運使沈公作賓精於吏職特重公事非公書擬不下筆
公詳審清介秉法据理雖貴勢無敢干以私者秩滿得
旨待掌故闕執政面諭欲越次先除公謝不願既歸四
年不通問執政怒超用他人久之除主管吏部架閣文
字嘉定初元除國子正遷武學博士諸王宮大小學教
授輪對歷疏廟堂除授宮掖請謁之病且言臣待罪班
行更化前後皆所目擊不知今日立政用人盡出於公
乎抑猶未免於私乎其視前日有以異乎抑無以大相

遠乎臣觀今世自上至下由內達外苟可遂私靡所不至良由陛下真誠有餘剛斷不足名為更化而實未嘗更化始欲善治而終不可善治別劄言民生憔悴極矣散內帑之儲省掖庭之費裁戚畹之橫恩濫賞覈貂璫之營繕應奉以裕民可乎又言今日之財不在官不在民獨積於賊吏之家破數十賊吏之家可活數百萬之民矣寧皇嘉納改國子博士請外出知興化軍世吏所謂擊斷操切之術一不用專以教化拊循為主時楮令

初變愚民坐減落官吏坐奉行不虔獲罪者衆前守綠
此罷去告訐繁興公下令曰貿易未受價者未為行用
告者以騙論已受價則予者受者俱坐罪如詔書於是
無告楮者常平使者令民間各以產高下藏楮於家而
委官點撞馬公曰民未孚也請為期既而屢寬其期及
撞點又使吏戶摘語之民得以為備比去不刑一人楮
價自增郡多名刹主僧例以貨取名曰實封寺偶闕僧
乾沒其穀以佐經費名曰拘椿惟公與秘監葉公禾不

實封不拘椿而郡計沛然催科至寬縣令不識訶問細民不識追呼又取三縣夏稅一錢至六十錢戶全蠲之第三至第五等戶減半第一第二等戶減三之一寺院減五之一以樽錢代輸他人蠲租者不過閭閻零為美觀惟公於未催之前預為約束民被實惠待吏民以君子長者未嘗設機械兩造情偽一覽洞鑒書判典嚴切中隱伏然其末卒歸於忠厚悖理之事梗化之民或接乎前應之以靜勝之以定終無忿怒之意有挾勢懷私

而來者見公容色辭氣莫不爽然自失而去郡人愛公如父母前後太守莫能及差知全州其治如莆下車甫兩月除提點廣西刑獄公事足疾力辭新命全人聞公當去皆嗟惜一日有峒獍數輩驚老矣造廷云云公使譯其語曰好知州難得願公奏天子勿去公慰諭遣之改知袁州於是疾愈而袁人將輅公矣公曰辭遠節得近麾可乎力請祠主管成都府玉局觀既滿再任改建康府崇禧觀紹興府鴻禧觀公素清約視榮利如糞土

歷二郡生業不長尺寸居室苟完無廣廈突兀之想田園僅足無牙籌筭計之入宅前籬援畧成門徑舍後花木初分行列公處之怡然萬鍾五鼎不與易也朝廷每欲收用常患公不可致今上御極召赴行在再辭再不允公又言臣進無補事功退無預世教直緣拙恙歸卧山林衰悴之餘不任朝謁惟聖朝哀憐上知不可奪除直秘閣主管亳州明道宮訓詞曰爾端靖老成近俾來歸而抗章三四尚親醫藥其以延閣珍祠遂爾恬養夫

飭身謹行為郡廉平者朕眷眷如此則貪刻躁競之習
亦可少愧矣明道祠滿詔再任公舊患足瘍時作時愈
紹定二年二月疾動至秋不愈食益少力益衰終日默
坐無情容顧子孫滿前無媿語疾革屏粥藥者累日正
襟拱手神間意定以至於歿九月三十日也年七十一
積階至朝請大夫公負高科著美譽而恬澹恥趨奉韜晦
無表暴故策名二十餘年纔為掌故學官去國幾二十
年始復召卒不至故志業不盡見於世每謂人不可有

勢不可有名平生不喜為要官曰勢之所在不願交聞
人曰名之所在其立意如此公學貫千載文章典麗條
達顧不肯以文名手藁皆焚棄惟廷試策與奏篇偶存
又有通鑑記纂若干卷凡前世大節目大議論悉著於
編兼采司馬公范太史胡致堂諸家之評傳以已意自
奉至薄筭無新衣庖無盛饌特喜施予族戚蒙賴晚食
祠祿歲取百千別貯之更五任得千緡置義田百斛以
贍貧宗公兄弟四人靖安海豐二令君先歿公與容州

使君秀眉黃髮消搖里閨時人以方二疏公臨終家人
問所欲言公曰無一事但恐戚吾兄耳娶宜人黃氏溫
陵人通直郎輕之女幼孤隨母聶夫人依兵部侍郎簡
肅林公簡肅為人勁峭獨與宜人語多合意甚奇之擇
配得公尤相賓敬宜人識度高深達義趣蔬食素飾安
於淡薄事姑舅至孝傾橐奉小姑奩具無吝色先公二
十年卒葬於清遠里福勝山之原二子公遇迪功郎監
潭州南嶽廟公選孫男四人曰觀曰全曰合曰新一女

適承議郎新通判潮州軍州事劉克莊自宜人逝二子朝夕侍公出入坐起跬步不離側家庭講肄意有所合輒喜曰天下至樂不出閨門之內公遇使調寧化尉不忍去其親自乞嶽祠孝謹恬退其家法然也二子將以是年十二月初八日奉公合葬哭謂克莊子盍論次先人遺事乎克莊亦哭曰丈人植立高望實重宜屬筆於能言者二子曰此先人意也克莊遂不敢辭初公年弭七秩堅悍不衰自克莊悼亡公追念賢女始衰始病悲

夫尚忍言之然二十年翁壻知公深者宜莫如我狀所述公出處去就言議風旨皆質之當世公論參以鄉閭聞見後之君子庶有攷焉謹狀

宋故朝奉大夫直寶謨閣前淮南路總運判官提點淮東刑獄兼知貞州寺丞方公行狀

曾祖淵

祖憲文林郎南恩州陽江令累贈朝議大夫父崧卿朝請大夫京西轉運判官累贈宣奉

大夫

公諱信孺字孚若系出河南繇琚而下代有聞人琚自
固始遷莆田至金紫公廷範六子皆貴顯而少監公仁
岳之後最蕃公其八世孫也生有異質襁抱中能誦書
九歲落筆屬文京西公守廬陵公猶牝角周丞相楊誠
齋見而驚曰天才也以郊恩補將仕郎京西服闕授番
禺縣尉諸公爭致之幕下才望傾一府盜有劫海賈者
公曰鼠子敢爾自挈舟往盜方聚沙上分擄獲見尉至

皇駭欲趨舟取械公先使人負盜舟去矣悉縛上府不
軼一人秩滿改承務郎丁嫡母葉碩人憂服闋知蕭山
縣丞浙東帥錢公象祖提刑傳公伯成被旨措置慶元
海道檄公往來區畫悉有條理二公亟稱於朝差兼淮
東隨軍轉運屬官未幾復還蕭山先是權臣首事既得
泗州謂中原可長驅及諸將潰歸敵傾國大入淮漢騷
動朝廷悔悟會敵亦厭兵駐軍濠州先遣韓元靚來和
議有萌芽矣督帥樞密丘公密一再令帳下壯士遺敵

書最後陳璧君玉往皆至濠而返終莫得其要領近臣
多薦公可專對有旨赴都堂稟議開禧三年正月三
日也既至諭以使事公曰多事之際不敢以母老辭但
開釁自我敵問首謀當何以對權臣惛然起謝借公朝
奉郎樞密院檢詳文字充知樞密院參謀官持督帥知
院張公巖書通問金國行省元帥府公馳至濠金帥赫
舍哩子仁在焉止客於獄露兩環守絕其薪水官屬或
灑涕公叱曰汝淚大辱國金畫五事要我公曰返俘歸

幣可也縛送首謀於古無例稱藩割地臣子不忍言敵
愠曰不望生還耶公曰某來時已寘死生禍福於度外
矣論辨甚久子仁不能難遂至汴見金左丞相都元帥
完顏宗浩浩以天獄二字榜傳舍曰此非濠州比公曰
事須商推何至以威脇人宗浩使二省龐趙者來持五
說如初且以無故興師咎我公曰本朝不旋踵追悔所
以斂兵納和浩曰正為無兵可斂公曰豈無淝水八十
之衆浩曰縛送事既無例姑置稱藩割地莫有故事否

公曰惟靖康嘗割三鎮紹興以東朝之故暫屈已今日
顧可引用耶此事不獨小臣不敢言行府亦不敢奏時
逆曦以蜀附金龐趙服公雄辨有張儀舌在西蜀脣亡
之誚公請面見丞相決大事宗浩坐幄中陳兵見公使
人傳諭云五事不從旌旗南指樓船東下矣公欲稍前
白事宗浩曰事止此無可議者遽授報書期公再來決
和戰四月公至在所詔公通問宣勞轉三秩御劄令侍
從兩省臺諫條奏所以報金者衆議還俘獲罪首謀增

幣五萬如紹興公再往龐趙來迎金聞曦誅氣頗索然
猶執初詞公曰本朝諸臣已謂增幣為卑屈況名分地
界哉金問其故公曰議者以曲全勝負較之皆云本朝
興兵在去年四月若詒書誘曦去年三月也若雖得滁
濠等州我不得泗漣水乎若夸胥浦橋之勝我不有鳳
凰山之捷乎若謂我攻宿壽不下若圍廬和楚竟何得
乎且五事已從其三猶過執不見聽不過再交兵耳楊
行密尚能以數州之地自立本朝幅員萬里江東將相

豈久下人者龐趙見公慷慨忠烈始微露其情曰稱藩
不從當以叔為伯地亦不必割歲幣外別致犒軍錢可
也公揣金技止此力執不許密與龐趙約定數事如遣
使草誓之內龐趙取公手記為信宗浩面授公書六月
復命再轉三秩用王忬例差充通謝國信所參議官奉
國書誓草及許謝百萬緡至汴金盡變前說易二省差
領客龐趙不復來矣宗浩怒曰所畫事未從何遽以誓
書使名來面責公不曲折建白且有誅戮禁錮語公不

為動一日使甲士擁公庭下荅狀公曰待行人如此耶
宗浩遽謝公歸館二省差來曰此事非攜軍錢可了別
出畫定事目公曰正緣歲幣不可再增故以通謝錢代
之今得此復彼某有頭壁俱碎而已二人曰龐趙誤公
公曰丞相誤龐趙又曰丞相欲留公等公曰辱命歸亦
死不若死於此議不決會蜀兵取散關敵益疑講和非
廟堂意且屢訐權臣無書公猶冀事成移私覲書帖若
權臣遺宗浩者九月公還自劾待罪朝廷謂公失事體

奪三秩臨江軍居住公自春至秋三往返炎沙烈日僵屍滿野公仗節轉仄蟲蛆臭腐間儻從道斃相屬公神間意定自若始受命入白太安人曰王事不可辭願勿以兒為憂公知金有內顧憂雖龜勉出兵與我相持而力屈情見勢不能久所求皆拒不予直欲以口舌弭兵又每訐首謀意指權臣公但以鄧友龍輩為對金恨公不少屈憎故其議壞於垂成而王公柁出使矣公雖貶方奉使之名滿天下時年才三十至臨江以詩酒自娛

江湖士友慕公盛名多裹糧從游明年和議成與金禮
幣函送權臣首皆公昔持不可者王公既以功擢用奏
記廟堂云方某辨折金人於彊項未易告語之時及桡
往權臣誅矣事皆勉從矣方某當其難桡當其易每至
軍前金必問方某安在且謂署行者三不委頓車上已
可伏矣公論所在金人亦不能掄詔公自便除通判肇
慶府復奉議郎尚寇竊發經畧司檄公督捕雄韶而諸
臺辟知新州未上有旨令同廖提刑德明措置收捕就

知韶州首封崇張曲江余襄公墓時江湖屬邑多燬於賊惟韶境晏然禽赤水崗賊首戮之又謀募鄉導擣巢穴布置已定朝廷用招降之說而止轉承議郎移知臨江軍以嘗謫居辭知道州郡有不檢士十輩號十虎力能使監司逐太守公下車立竄首惡飾濂溪祠作太史閣與萊公樓對尋元次山遺跡表暴之除提點廣西刑獄閱蜀郡滯獄有踰百十年不決者有一事株連數十家者公件畫條析以聞詔下一日破械縱數百千人始

楊公方按部以風力自任疑南官例有贓發擿無虛日
守令竄繫尤衆公攷罪虛實多奏釋之單馬行部內訪
民疾苦荒鎮惡縣無停驛處張幙野宿以為常足跡未
及者海外四郡耳轉朝奉郎除轉運判官紹熙間京西
公實持漕節定鹽法改客販為官船奏罷歲解鄂靖錢
十一萬緡廣民德之及公踐世職父老即永寧寺西廡
祠京西公文人詞客俱有歌詠紀述焉公深知鹽筴利
害搏幹裁損自出新智漕計沛然以之新學宮增士廩

創類試院又蠲諸郡鹽逋三十六萬緡曰此皆積壓日前官吏失陷之數蓋有身死家破子若孫拘係未脫者祿伐國家元氣多矣吾蠲此錢所以廣聖恩承先志也遇僚屬有恩意歲舉先孤寒後貴要雖小校裨將皆能得其歡心有不幸者公必歸其喪與孀焉弭節四年再攝帥閩威信行於一方除提點湖北刑獄未行召赴行在奏事入對除大理丞於是邊事復動除淮西轉運判官未行改淮東兼提刑知真州始至視州城曰是中

惟官寺營廩庫廩耳民旅皆居江下城誰與守請築翼
城圖上不報嘗登高覽望知城西北當風寒即北山匱
水馬繚以石隄廣六里長二十里決之則西北可為海
身率畚築旬日匱成設醴賞謀敵覈郡兵新旗幟金鼓
增弩礮治蘭石渠閘深壕塹高羊馬墻日不暇給然賓
客觴咏之樂亦不廢郡人先懲開禧事多聚保沙上公
携百口奉太安人居官淮民復業日衆醴鹽之利倍增
減官私屋賃直十之三徙瘞戰骨三十七窖於高阜軍

民感奮轉朝散郎敵入盱眙游騎出沒天長六合間公乘小車慰拊令民勿清野帥司移文報揚州已乘陴公方就寢鼻息如雷通判求檄携家渡江公劾其搖衆客曰公以死守是也如壽母何公曰吾母雖憊殊有昔人伏劒之風制帥尚書李公珣趨揚州督師公夜乘小舟掀舞巨浪會於黃天蕩中秉炬劇談謂盱眙擁重兵閉壁不出揚楚堅坐自保彼深入不足怪又言敵頓兵月餘過城不攻掠野無獲方且夕出剽民牛羴豈復昔日

之敵哉誠得尺寸柄號召諸將願身為士卒先彼可一
戰平也李公擊節曰君言差強人意將檄公督戰敵拔
寨去矣山東始內附公抗言豪傑不可以虛名駕馭英
雄不可以弱勢填壓宜選有威望重臣將精兵數萬開
幕府山東以主制客重馭輕磨以歲月翦荆棘為沃野
化盜賊為耕農不特外包山東內固江北而兩河固在
吾目中矣朝廷未遑也歸附人李全新立功遺以金盃
戰袍舟載麥餅酒壺饗其衆節制司疑公撓權公又論

劾豪吏所親多諫止公正色荅曰彼以勢此以理吾買
草屨行矣既而讒甚交起詔別與州郡後省駁奏公徙
家沙上以為民望遣饋山東是謂侵官降三秩免歸時
公家固在城內未嘗徙也其後敵薄儀真守將洩水置
兵退城全翼城竟築山東河北建節制鎮撫大使皆如
公言公先卜第城南至是奉母居焉中堂作複閣扁以
詩境鑿田為壽湖中累海石為山環植荷柳松菊間著
茅亭木棧徜徉其間若與世相忘者差主管華州雲臺

觀叙承議郎寶赦授朝奉郎祠滿改建康府崇禧觀公
氣稟素強初得疾覺大熱以密拌梨橘漿盃飲之繇是
胃弱惡食或勸迎醫旁郡公曰吾貧至此豈復有人復
賢卧閣八旬神情不少衰病革賦詩數章手執如意顧
小史張武侯像屏間又興入太安人卧內嗚咽問起居
以嘉定壬午臘月二十有六日卒年四十六朝廷嗟惜
轉朝奉大夫直寶謨閣致仕人知君相待公之厚而悲
公之不及見也安人葉氏丞相正簡公孫賢淑有志操

素羸治公後事哀瘠不能起後半月卒太安人林氏公
生母也悼念兒婦閱五月又卒二子左鉞迪功郎德慶
府司法參軍左繩文林郎昌化軍司戶兼錄參孫一人
左鉞等將以癸未十一月三日壬寅奉公及太安人安
人之喪合葬於侯山公自號紫帽山人又曰好菴葬處
蓋紫帽之第三峯而好菴扁墓廬云公美姿容性踈豁
豪爽幼及交辛稼軒陳同父諸賢安公素不識公面一
見握手如舊晚開宣幕辟公參謀不就與李公璧吳公

獵傳公伯成尤善公才高事方橫衝決他人莫敢措手
公談笑直前當之常慕王景畧劉穆之李文饒為人及
擯不用袖手怡然亦無鬱鬱不平之意自改秩終其身
不乞憐易服色澹於榮利如此人視公若磊落宏放而
公內行極飭事母盡孝粥藥必親太安人苦風痺常自
扶掖卧起默禱於天願減筭十年益母壽事兄如事父
疎姻遠族皆收卹貧不能喪葬嫁娶者傾橐助之素不
喜治生視金帛如糞土出疆時流民環繞公以千萬盡

散賜金與之尤好士所至從者如雲閒居累年家無僮
石而食客常滿門蒼頭廬尔多散而之它僅存侍妾數
人後亦辭去歲饑猶斥賣書畫煮糜粥施棺以惠流殍
屬續葉安人鬻冠珥乃克殮公有山水癖好遊羅浮一
月忘歸既探禹穴觀黃河度桂嶺浮沅湘登衡嶽而涉
洞庭彭蠡矣由淮東歸度暑廬阜與黃寺丞幹李司直
燔縱遊南北兩山豪墨淋漓天下有山水處鐫刻殆徧
道泉與真公德秀留公元剛登九日山距城二十里西

淙瀑泉千丈蜚落雲杪公見之大喜曰此豈減雁蕩開
先而千百年無人知者即募壯夫平險通道絕頂銀河
觀下為玉虹亭曰吾老於此矣匹馬一童興至即往一
月中率半宿瀑上公貫穿羣書為文未嘗起草初若不
入思細視皆平夷妥帖無斧鑿痕嘗從山陰陸公游問
書陸公為大書詩境二字龍泉葉公適靳許可晚有文
星直莆中之句蓋為公發陳郎中孔碩見公近作曰漸
趨平澹矣平澹詩之極致所謂中庸不可能者有南海

百詠南冠萃稿南轅拾稿曲江嘯咏九疑漫編桂林丙
三集擊缶編好菴游戲集皆板行出嶺後詩文三卷壽
湖稿一卷通問語錄三卷藏於家克莊少小親公晚受
公薦公退居克莊亦奉祠日相從於荒原斷澗之濱歸
自嶺外公自危憊尚攬衣起坐相勞苦因泣下數行訣
曰以後事累子葬有日左鉞請狀公之行克莊曰公門
生故吏多宜擇所付辭既不獲念公被選使金先君為
樞屬實預其議淮東事項游江淮幕府目擊廣右事聞

之桂州父老故詳著之以俟君子焉謹狀



後村集卷四十八